

Olav Kvam – 85 år... og like sprek!

Lett på foten og stødig i dansen, kven skulle tru at Olav Kvam runda 85 år 15. februar i år. I høve dagen og alle åra vart han feira med blautkake, blommar og godord på øvinga i ringen 16. februar.



Olav er sogning og kjem frå Sogndal. Sitt yrkesaktive liv starta han på postkontoret i Lærdal og kom til Oslo i desember 1953 for å gå på Postskulen. Etter endt skulegang vart det avdeling for brevpost utlandet, brevsjefens kontor, Postgiro, Postbanken og Postdirektoratet. Innimellom også beordring som poststyrar i Drøbak og på Grorud, når det vanta plassansvarlege personar.

Dansaren

Lett på foten og med hug til å dansa tok han fatt på danseskule for moderne dans i 1960. Noko seinare vart det kurs i gammaldans i regi av Oslo Fylkeslag (BLS) med *Magnhild Winsrygg* som rettleiar. I 1963 var det Nordleik i Oslo, og Olav var med. Året etter kunne Sognelaget i Oslo runda 50 år og feira stort i Landbrukssalen. Begge desse to hendingane var medverkande til at Olav vart med både i Sognelaget og ikkje minst i Sogn og Fjordaneringen. Kvart einaste år frå 1964 har Olav ikkje berre vore 'medlem' i ringen, men delteke på det meste av øvingar, kurs og tallause framsyningar.

Truleg er han den som utan avbrot har delteke på flest øvingar, dugnader, framsyningar og utanlandsturar i alle desse åra. Olav møter framleis kvar einaste veke på dei faste øvingane i ringen! Han var også ofte på Sognehytta og deltok på skirenn for Sognelaget.

Lagsarbeidaren

Han har vore med i styret for ringen i fleire bolkar. Var kasserar i 1967, 68 og 69, revisor i fleire år på 70- og 80-talet. Nestleiar i 1997 og 98. Vara til styret frå 1999 til og med 2004. I fleire tiår og framleis har Olav sytt for innkjøp av rekvisita og forbruksvarer til ringen. Han har dessutan sete i styret for Sogn og Fjordanelaget, som kasserar i fleire år. 17. mai dansar ringen kvart år på fleire sjuke- og aldersheimar i Bærum, og her òg har Olav vore sjølvskreven deltakar mest kvart år.

Olav si liste over framsyningar og utanlandsturar er etter kvart så lang at den er uråd å ta med alt her. Fleire andre leikarringar fekk også augene opp for Olav når dei skulle ut på krevjande oppdrag og utanlandsturar. Hordaringen (6 turar), Symra, Moss leikarring og Hunar har alle hatt glede av Olav som dansar. Olav har òg vore en ivrig brigdespelar og har hatt stor glede av det også.

Æresmedlem med fartstid

Frå 1965 til 2015, ei tidbolk på 50 år!, har Olav vore aktiv dansar, utan avbrot og med på utanlandsturar kvart år i regi av ringen eller andre leikarringar. Dessutan på folkedansstemner, representasjonsoppdrag og framsyningar. Når folkedansarar snakkar om bunader i fleirtal, er det ofte 'andre' (ikkjedansarar) som stussar – men når bunaden vert 'arbeidsantrekk' og i periodar mest dagleg, vert også bunader utslitne. Dette har Olav òg fått erfare. Første bunaden fekk han i 1966 og den neste i 1990 – Olav er den som har lengst samanhengjande fartstid i ringen. Og han har heile tida vore velvillig og klar for både små og store utfordringar og oppdrag! På 50-årsjubileet i 2004 vart Olav utnemnd til æresmedlem i Sogn og Fjordaneringen.

‘Lett trør han dansen framleis’, og til sommaren er det tur til Færøyane med bunad og dansesko for Olav og ringen.

Tekst: Anny Sollid

Olav sine utanlandsturar med folkedans.

Litt av ein CV...

1966 Nordleik i Odense, Danmark
1967 Folkedansfestival i Dijon, Frankrike
1970 Nordleik i Stockholm, Sverige
1971 Leutkirch, Tyskland, saman med Sandvika Musikkorps
1973 Nordleik Espo, Finland
1974 Island (1100-årsjubileet for landnåmet)
1975 USA (for det meste Nord-Dakota) saman med Bygdelagskoret, Sinsen Ungdomkorps og songaren Noralv Garborg / pianist Kaare Ørnung
1977 Folkedansfestival i Santarem, Portugal
1979 Folkedansfestival i Eibergen, Nederland
1981 USA (Midt-Vesten) saman med Symra
1982 Nordleik i Gøteborg, Sverige
1983 Romania saman med Laget for folkemusikk
1984 USA (på kryss og tvers)
1985 Nordleik i Åbo, Finland
1985 Festival i Letterkenny, Irland
1986 Folkedansfestival i Bursa, Tyrkia
1987 Berlin, Tyskland, saman med Symra
1989 Færøyane saman med Hunar leikarring og Eidsberg Trekkspillklubb
1989 Folkedansfestival i Burgenland, Østerrike
1991 Nordleik i Vejle, Danmark
1993 Canada og USA
1994 Nordleik i Linköping, Sverige
1995 Tyskland og Tsjeckia saman med Symra
1997 Nordleik i Vasa, Finland
1999 Irland saman med Moss Leikarring
2001 USA (Vestkysten) saman med Hordaringen
2003 Nordleik i Næstved, Danmark
2004 Polen saman med Symra
2006 Nordleik i Gøteborg, Sverige
2007 USA (Vestkysten)
2009 Nordleik i Lahti, Finland
2015 Nordleik i Viborg, Danmark
I tillegg kjem turane til venskapsringen Norbergs Folkdansgille i Sverige, 8 turar dit i tidsrommet 1965–1982.